



PORTAVÓS VI GOVERNUN KONSTITUSIONÁL



KOMUNIKADU BA MEDIA

Loron 17 fulan-abríl tinan 2015
Dili, Timor-Leste

Konsellu Kombatente Libertasaun Nasionál sira nian sei estabese formalmente

Dezenvolvimentu "Konsellu Kombatente Libertasaun Nasionál sira nian" [CCLN-sigla iha lian portugés] fó hakat importante ida ba oin iha semana ida ne'e ho aprovasaun ne'ebé Konsellu Ministrus halo, iha loron tersa, ba Dekretu-Lei ida ne'ebé mak estabese Konsellu ne'e ninia objetivu sira, estrutura no funsaun sira.

Konsulta sira kona-ba Konsellu ne'e halo ona ho veteranu sira hahú husi kedas tinan 2011. Dekretu-Lei ne'e fó ba CCLN funsaun hanesan órgaun konsultivu Governu nian, hodi rekoñese papél kombatente sira nian atu estabese pás no estabilidade sosiál no mós papél ne'ebé maka sira sei kontinua soi iha dezenvolvimentu sustentável Timor-Leste nian.

Bainhira lei ne'e hetan ona promulgasaun, komisaun ida sei simu knaar atu estabese Konsellu ne'e, iha períodu ida ho durasaun fulan neen.

Dekretu Lei ne'e mós estabese loron 3 fulan-marsu hanesan Loron Nasionál Veteranu sira nian. Ida ne'e atuhodi rekoñese loron 3 fulan-marsu tinan 1981, hanesan loron iha ne'ebé hahú reorganizaun Rezisténsia nian, ne'ebé representa marka ida ba-iha Luta ne'e no akontese iha períodu ida ne'ebé mak difísil liu iha Luta ba Libertasaun Nasionál nian.

Portavós Governu nian, Ministru Estadu Agio Pereira hateten katak "aprovasaun ba Dekretu-Lei ne'e, fó dalan ba harii Konsellu Kombatente Libertasaun Nasionál sira nian nu'udar hakat ida ne'ebé importante atu fó onra, serbí no envolve kombatente sira ne'ebé mak luta ona atu liberta ita-nia nasaun". **FIN**



Ágio Pereira
+670 7723 0011
agio.pereira@cdm.gov.tl
govtlmedia@gmail.com
www.timor-leste.gov.tl